

Pitadi Bepañ'walañ metamdok pepa timen youyemguk Yodakale Mede

Pitadi pepa timen youkuk i yadi kayonbop malabumun wapum ginen hatigin'walañ nadisukilitihik tubukilitiyemdok youkuk. Ala indin youkuk. Kayonbop heki adi Jesu Kilisto'walañ mede momoon wendok kotigon nadisunen. Jesu adi kumuna kotigon kaikaan pilakuk tina adi kotigon udaneen bubundok yofafaneguk. Metam adi yofafanenin wendok nadin woomilune baak.

Biyagon, kayonbop heki adi malabumun hekin, inon nemek u mintalak uyadi nadisukiliti ginen fafañen yayatdok mintalak. Undun doktina nadisukiliti tina fafañen hatilune Jesu Kilisto kotigon udaneen baak, kan unanin tuwanin momoon beneen.

Pitadi yokahan mede youkuk

¹ Nu Pita, Jesu Kilisto'walañ Aposel hatilatdi Bepañ'walañ metam kwetkwet danepupuhener Pontas en Galesiya en Kapadosiya en Esiya tina Bitiniya kwetnen bunambu hatitawin hiditok pepa i youhamulat. ² Bañ Bepañ adi koomkwaha nadihebet tubu hali buguk wendin foloon ne-tok gigit habukahileguk. Undun tina hidi Jesu Kilisto'walañ medenin takalidok nadin Ungonin

Munabuli kamehambune hehitubu-lodaune hati-hatihik Bepandok mindapmaan ungoni tigi. Undu tubune Jesu dini nangatdi hehiyoutewalandaune Bepan'wala heben folon walandagin hati.

Bepan'wala silon tobogon en kulemadi hidi'wala kade toki ha tuwaak.

Hatihati fafani inditok gigit tiulidokoon kameguk woomnimilak

³ Indi Wapumnik Jesu Kilisto'wala Beu Bepan niutumbayaneem. Adigon Jesu Kilisto kumu gineni tubukaikaune pilakuk dokti inditok welekulema wapum tinimi ha tihati kobuli fafani tubumintanimguk. Indi wendok nadikunakunaleen hatiam. ⁴ Ala koug hatigene kunum folon yohikwehik momoon, fiit mu tibaak, wala hinek, fafani, hidi tok gigit yon tiulidokoguk hatak, u kahileneen. ⁵ Hidi nadisukilitini hati dokti Bepan ne'wala sari ni nidi habudokolak. Adi undu titaulune Jesu Kilistodi mintan hehitubulodawaak. Ala won adi koug nai dapmawaakne ku mintadakalewaak on. ⁶ Hidi nai indidegon Bepandi nemek tibaak u nadi wendok nadifo ti. Ingon on, nai muni kabe hatilune tikamanda mebimebidi mintahamun hehitubu-figitaneen.

⁷ Hidi agan nadiin. Gol* adi fafaŋenin mu halaak ingon kudup ginen heune daan foloon hinek u dakalelak. En nadisukilitihik adi gol kalakapmeen nemek foloon hinek tilak. Undugon hinek tikamanda mebimebi mintahamiin won adi nadisukilitihik Kilisto'walaŋkade hatak u mingon tubumintalak. Bepan adi unduku tinja hidi'walaŋ nadisukilitihik dinin mebi tubu-dakalelak. Kan wendi Jesu Kilisto'walaŋ wougigit tubuhautawaak. ⁸ Hidi yadi Kilisto mu kagin ingon on, hidi aditok hinek nadinja welehikdi kahilein. Nai indidegon foloon mu kain ingon on, fiit nadifo tinja nadisukilitimiin. Nadifohik wendi kwetfolon nadifo noli haliulak u yalakapmelak. Won adi manikdi mebinin yodakalenimdok tuwot mon. Mon hinek. ⁹ Undun doktinja Bepan adi nai indidegon Jesu nadisukilitimilune habunja netok habukahileen hanagitak.

¹⁰ Koomkwaha polofet heki adi Bepandi nemek foloon tihamulak wendegon medenin yohautagin. Adi yadi Bepandi kotigon nibukahileen ninigilaak yoguk mede wendinin mebi nadidok kwanai baigon hinek tagin. ¹¹ Nai unanin Kilisto dinin Munabulidi polofet heki'walaŋ welehik maanen hatiguk. Tinja Munabuli wendigon Kilistodi folofigita mebimebi naditauyen me lolonit tibaak wendinin medenin yohautaluguk. Wendoktinja polofet heki adi nai denin hinek

* **1:7:** Gol adi kawade dabugon malabuhi kwet maanen ikiin, ala kwanaimin tinja yehitubu-mintaan mongola woon kudup wapum ginen hein. Kan datilitiliyen gol foloon mintadakalelak, kan gengen adi foloningon labulak kan gila benja yakukiin. En gol foloon adi benja nemek foon tutumbain.

metam kotigon ninigitdok me u baak, en adi baaknen nemek dediningon mintawaak, undun yonadiyagin. ¹² Polofet heki adi nehitok tina mon, hiditok tina kwanailegin u Bepandi agan yenimbihikuk. Mindankade adigili Ungonin Munabuli kunum ginenin kameune foon metamjiye yehitubu-lodaune adi'wala Mede Momoon yohautaan haningin. Kan ajelo heki adi undugon nemek hidi kanadi tiin u kakan dok hinek nadin a woom-hatigin.

Ungonin hatidok

¹³ Undun doktina hidi helemahelman nadisukilitidi nadinadihik tiulidokoon hatihatihik momoon gon kadokoyaneen. Hidi nadisukiliti hinek tina Bepandok nadikunakunale tina woomilune adi silon tobogon Jesu Kilistodi mingon mintadakaleune titindok yoguk u tihambaak.

¹⁴ Hidi yadi wapmihi mede nadinadihinit wendok tuwolit hatiyaneen. Koomkwaha hidi yadi nadisuhinit mokit hatinila hide'wala nadi-galika hogohi mebimebi tihatiyagin. Ingon nai indidegon adi undun kotigon mu taneen. Mon hinek. ¹⁵ Bepan adi agan koom kuti-haniguk. En ne adi ungonin tina undugon kudin be titinjin didimeningon hinek tilak. Undun doktina hidi hatihatihik be nadinadihik be titinhik kunilit Bepandok mindapmaan ungonin hatiyaneen. ¹⁶ Diki indin hatak, Bepan'wala Youkudipdi indin yolak, "Hidi yadi ungonin hatinila talik be titin didimenin takalina taneen.

Nu na ungonin hatilat doktina hidi maan un-
dugon, ungonin hatiyaneen.”

Bepan adi Jesu'walaɗ naɗgaɗdi nihituwaɗuk

¹⁷ Hidi Bepaɗdok “Betnik” yoɗa niutumbain.
Betnik adi yaɗi wotninik doktina mu nihi-
danelak. Adi metam hatihati be titinikdi
mebinik yobihilune nihidanelak. Unduɗ doktina
helemahelemaɗ hidi kwetfolon inon hatinila in-
din nadiyaneen. Kwet i hatiyam adi yotnikwet-
nik mebi hinek mon. I adi hogok buɗambu
hatiyam. Unduɗ nadinɗa Bepaɗ mulelem timina
aditok nadimimbune lolonɗit tuluwaak.

¹⁸ Hidi agaɗ nadiin. Koom adi mamahi-
papahiye'walaɗ hatihati be titin u behatina
wendok kwanai tagin. Ingon on, Bepaɗ adi
agaɗ hehituwaan hatihati be titin foloonɗit
mokit ginenin hehikagiyakuk. Tina nemek
kwetfolon liwe tilak, silwa be gol wendi
mu boina hehituwaguk. Mon hinek. ¹⁹ Adi
yaɗi Kilisto dinin naɗgaɗɗinɗi hehituwaguk.
Naɗgaɗ won adi tuwaɗin lolonɗit hinek.
Kilisto adi dompa mihinin walaɗin hinek,
kadakaninɗit mokit. ²⁰ Bepaɗ adi Kilistodi
kibikonɗik kameen nihituwadok koomkwaha
kwet mu mintalune timenon yohebet tuguk.
Kaɗ nai dapmalune hatiyam indi nihitubu-
lodadok adi Bepaɗdi Kilisto agaɗ kameune
minon mintaguk. ²¹ Adigon hehitubu-lodaune
Bepaɗ nadisukilitimiin. Bepaɗ adikuyenon
Kilisto kumuɗ ginenin tubukaikaan tubupilali
wougigit wapum minuk. Unduɗ doktina

hidi'walaŋ nadisukilitihik be nadikunakunalehik u Bepaŋ'walaŋkade hatak.

Bepaŋ'walaŋ mededi fafaŋeniŋ halaak

²² Hidi mede biyagoŋ u nadiŋa takaliune wele-hik walandaguk, unduŋ tiŋa hidi welehikdi me hekinolit folooŋ hinek tigiŋ. Unduŋ doktiŋa welehikdi kifolok tiŋa hatiyaneeŋ. ²³ Tiŋa hidi kobuli kotigoŋ mintagiŋ adi youli liwe tibaak wendi'walaaniŋ moŋ, adi youli kedem hinek, Bepaŋ'walaŋ mede hatihatinit eŋ fafaŋeniŋ ha-laak, uŋaniŋ kadoŋa kotigoŋ mintagiŋ. ²⁴ Tiŋa mede niŋ indiŋ hatak:

“Metam hogohogok adi kilihikit dabugoŋ,
Folonamandaphik adi wowoŋgimiŋ dabugoŋ,
Kilihikitdi sigenelak eŋ wowoŋgimiŋdi gilop-
malak,

²⁵ Ingoŋ Bepaŋ'walaŋ mede adi fafaŋeniŋ ha-laak.”

Bepaŋ'walaŋ Mede Momooŋ iŋakoŋ yohautaan haniŋgiŋ.

2

Jesu adi kawade hatihatinit

¹ Hidi indiŋ nadineŋ. Kadakaninŋ mu titiŋ, eŋ yalaŋ mede, eŋ me yalamut eŋ nadikwihita tiŋa me yeniwoliwolike, nemek u hogohogok kwihililiwenekut taneŋ. ²⁻³ Hidi agaŋ koom na-didakaleeŋ yogiŋ, “Wapum adi momooŋ hinek.” Unduŋ doktiŋa wapmihi ŋakŋakdi nomdok hogok nadiŋ undugoŋ hidi maŋ munabulihikdok nom momooŋ Wapum'walaŋ tutumba uŋgoŋiŋ diniŋ Mede Momooŋ wendok nadisuyaneŋ. Unduŋ

tiŋa uŋakon welehiŋ ginen nadidahiŋa bedikilitineen.

⁴ Hidi Kawade Hatihatinit'walaŋkade woon galineŋ. Adi Wapum kuyon, kwetfolon medi kahaŋindan mon yogin inŋon Bepandi kan nadiune momoon hinek tubune netok yonŋa kahileguk, ⁵ ale hidi Wapum'walaŋkade woon galiŋa kawade hatihatihinit dabugon mintaune Bepandi hehitomboyoulune Unŋonin Munabuli dinin yot tineen. Undun tiŋa Bepan'walaŋ muni hehenmebop unŋonin tineen. Tiŋa munabulihikdi hehitubu-lodaune hatihatihikdi Bepandok muni undun hemineen. Kan adi Jesu Kilisto doktiŋa nadiune utumbawaak. ⁶ Bepan'walaŋ Youkudip ginen mede indin yogin hatak,

“Nu Saiyon tuwaiyen unŋon kawade nin kamelat u kan nadineŋ. Kawade daninin momoon hinek u Bepan adi netok yonŋa kahileguk. Ala nebek ninŋi adi nadisukilitimimbaak adi yadi meka mu nadiwaak.”

⁷ Metam nediyeŋ kawade u nadisukilitimiin aditok adi nadiune momoon en lolonnit hinek tilak. En metam nadisukilitihinit mokit aditok adi indin yonit hatak.

“Me yot maman tiin adi kawade i mon yonŋa kahaŋindan bikabugin inŋon on, wendigon daninin tuguk yatak.”

⁸ En diki indin.

“Metam kawade wendok folonŋon kayohik youfilidaneen. En kawade bigim wendok folonŋon kayohik youtigiyem tiŋa maan udihiwaak.”

Adi yadi Bepañ'walañ mede nadikabeleen mede wobu tiñ doktiña kayohik youtigiyem tiña maudihilak. Wonñ adi agañ koom Bepañdi unduñ tineen yoguk wendok tuwolit mintayemilak.

⁹ Ungoñ tomboyoula indinñ hatak. Hidi yadi agañ Bepañ netok hinek habukahileguk, en ne'niñ silonñ kwanai titindok me wapuhi lolonñit hapmeguk. En metambopñiye ungoninñ tiña Bepañ ne'walañ metam, tiña hidi kadakaninñ dininñ mambip ginenñ hatilune hautañinñ momoonñ ginenñ hanagila labuguk doktiña niutum-bayaneenñ. ¹⁰ Hidi koom Bepañ'walañ metam mu hatiginñ. Nai indidegonñ adi agañ Bepañ ne'walañ metam hinek hatiinñ. Bepañ adi koom welekulema mu tihamguk. Nai indidegonñ adigili kedem welekulema tihamulak.

Titinñ kedem hogok taneenñ

¹¹ Notneye momohi hinek, nu indinñ hanimbe nadinenñ. Hidi kwetfolonñ wahingonñ en bunambu hogok hatiinñ doktiña siloda kadakaninñ, welehik dininñ memik u kadakaleenñ kelekufatneenñ.

¹² Unduñ tiña metam Jesu mu nadisukilitimiinñ adi'walañ lekingonñhik folonñ didimeningonñ hatiyaneeñ. Unduñ hatibune adi hidi'walañ titinñ kedem u kañ habudakaleenñ kadakaninñ titinñ haniinñ u wabineenñ. Unduñ tiña hatigene kougong Bepañ baaknenñ hidi'walañ titinñ kedem u kañ Bepañ niutum-baneenñ.

Wapum'walañ tipilapilaye-me hatiyaneeñ

¹³ Hidi Wapumdok tiña gapman dininñ mapme be me lolonñhinihiyedi yodoko mede mebimebi yotiulidokoginñ u nadinñ tagimneyaneenñ. Mapme

ne me lolonjit hinek hatilak doktiņa medenij nadi tilolon taneen. ¹⁴ Tiņa gapman kwetk-wet yapmetauguk adi'walaņ mede maan nadiņa tiloyaneen. Adigon metam kadakanij titij yehitubu-didimeen kadakanijhikdok kibikon yemaneen. En metam fofohi adi yeniutumba taneen. ¹⁵ Bepaņ adi hidi titij kedem tubune wendi metam kaulehi, nadisuhinit mokit'walaņ mahik teheyemdok yonā nadilak. Adi unduņ doktiņa gapman'walaņ mede nadiņa tilolon taneen hani-lak.

¹⁶ Kilistodi hidi kadakanij dinij folofolok ginenij hehifiyakukuk doktiņa hidi yadi foloknit mokit hatiyaneeņ. Ala hatihati wendi kadakanij dinij yawe mu tibaak. Hidi yadi hide nadinadi hatinila Bepaņ tipilapilaye timiyaneen. ¹⁷ Noli indij taneen. Metam hogohogok titij momoon tiyemaneen. Tiņa nohiye Bepaņ nadisukilitimiņ welesilon tiyemaneen, en Bepaņ gikingon timiņa wou nintiloon niutumbayaneen. Tiņa mapme maan gikingon timiyaneen.

Kwanai metam dinij mede

¹⁸ Noli indij, metam kwanai tuwahinit mokit tiin, hidi bombonjihiyedok nadiyembune loune gikingon tiyemiņa medehik tagimneyaneen. Won adi bombongi fofohi en kulemahidok hogok mon. Bombongi me kongolondahi maan undugon tiyemaneen. ¹⁹ Undihiyen folofigita mebininit mokit hamfit tubune hidi Bepaņ doktiņa hogok nadikulemaan hatibune Bepaņdi habuņa nadiune utumbaluwaak. ²⁰ Diki indij. Hidi kadakanij tubune hidihiune kabup

nadikulemaan hatineen ingon on, wendinin kibikon mangon mongotneen? Biyagon, hidi nemek momoon tineen ingon on, hidi hifit tubune hidi tokwihitanit mokit nadikulemaan hatineen adigili Bepandi wendok nadihambune utumbaluwaak.

Jesu'walaŋ kayoŋtalik takalidok

²¹ Hidi yadi unduŋ titindok haniŋit. Mangonde, Kilisto adi talitimen tihamuŋa hiditok folofigita nadiguk. Ale hidi adi'walaŋ kayoŋtalik u kaŋ ungon takaliŋa uneen.

²² “Adi kadakanin nemu tuguk.
En maninŋi yalaŋ nemu yoguk.”

²³ Adi ninƙadakaune kibi mu yeninƙadakaguk. Be folofigita mimbune kibikon dok mede mu yeninguk. Adi yadi kibikon kwanai u Bepan'walaŋ kohon folon kameguk. Adi hogokdi mede yodapmaan didimeningon tilak. ²⁴ Indi'walaŋ kadakaninŋi adi folon loune kolon dabeƙ folon mongola loguk. Unduŋ tubune indi kadakanin kotigon mu tinƣa ungonin hatiyaneem yonƣa unduŋ tuguk. Adi utubufigitaŋ wondi indi nihitubu-kedebaguk. ²⁵ Hidi dompa nabugon talik moinin ugin, ingon on, nai indidegon adi agan Dompa Kadoko Momoon'walaŋkade udaneen bugin. Adi kubugon di hidi'walaŋ munabulihik yabudokolak.

3

Tamwoi'walaŋ mede

1-2 Tam yohohiyehinit, mede timen youlumun undiningon hiditok indin yobit. Hidi yadi hidetok nadiune founé yohohiye hebehik ginen gitagon hatiyaneen. En nin e indin hanimbit. Tam noli, hidi'walañ yohohiye adi Bepañ'walañ Mede Momoon sigilulum timiin, ingon, tamwoi, hidi wendok yeninto mu tiña hidi hide talik didimenin hatibune yohohiyedi hidi'walañ hatihatihik u yabunadina welehek tubutakaleyaneen.

3 Hidi sigihik hogok tinahukulimindok kihik hampun folon tikudikudile, en dahidahi kudikudi momoon hinek, be komkom tuwanin loloñnitdi tinahukukin wendi foloon mu tilak. ⁴ Adi tobo tinahukut momohi, kadaka mu tineen, wendi welehek maanen tinahukukaneen. Tinahukut won adi welemomoon en welekulema. Munabulidi welehek maanen titin undihi tubumintaune welehek gumotalak. Tiña tinahukut fofoon en fafañenin wendi tinahukuyembune Bepañdi habune loloñnit hinek tilak.

5 Tam didimehi komihi adi undun tiña nadikunakunalehik Bepañ'walañkade hogok kameyagin kan wendigon folonamandaphik momoon tuluguk. Tiña nehitok nadiune fofoyeune nehi'walañ yohohiye hebehik ginen kulemangon hatiyagin. ⁶ Koom Sela adi unduku tiña Abalahamdok me bombongi nina manin mede tagimneluguk. Ala hidi munta mu tiña titin didimenin takalina tiña adi'walañ wabinje hatiyaneen.

Mewoi'walañ mede

⁷ Agañ me tamhiyenit hiditokbo hanimbit. Hidi hogohogok wanakan, tamhiyedut mede yonadi momoon en kulemanjon taneen. Tina tamwoi adi saninihik longon hatak doktina yehitubuloda fofonjon taneen. En nemek foloon hinek adi indin. Adi maan hatihati fafaniendok gigit hatiin undun nadiyemina adut welekubugon tina nadifo folon Bepan ninadiyaneen. Undun tubune nemek nin di ninadihik kamehep tuwot mu ti-hambaak.

Kiukiut mede

⁸ Yon adi wanan kiuthik hanimbit. Hidi wanakan hogohogok welekubugon tina yofulan kitubuloda momoon taneen. Undun tina hidetok nadiune fofonit tubune malabumun be bulaninjon nai ginen welesilon en hekinolit momoon tina kitubuloda taneen. ⁹ Mede wendinin diki indin hatak. Kadakanin tihambune kibibo kadakanin mu tiyemaneen. Be haninkadakaune kibimaan mu yeninkadakayaneen. Hidi yadi tobo yeninkahan taneen. Bepan adi undugon taneen yon hanihehimaneguk. Ala hidi undun tina Bepan'walan kahan yabukahileyaneen.

¹⁰ “Nebek nin adi kwetfolon injon nai kweheyenin hatina nadigalika titindok nadikaan adi mebelem kadokoune kadakanin mu tuluwaak, en mami kamehemimbune yalan mede mu yobaak.

¹¹ Undun tina kadakanin sigilulum timina nemek kedem hogok tuluwaak.

Tiŋa kulemanŋon hatiŋa wendok kwanainŋin fafaŋe tiŋa tuluwaak.

¹² Wapum adi metam didimehi'walaŋkade dau diwe tiŋa yonadihikdok magi kametnadi tilak.

En kadakanin titiŋ heki adi Wapumdi yabuŋa sigilulum tiyemilak."

Titin didimenin doktiŋa folofigita kedom nadi-dok

¹³ Hidi nemek kedom titindok nadigalika tiŋa tulune nediyendi yonŋa hehitubu-figitawek, ¹⁴ be titiŋ kedom doktiŋa hehitubu-figitaneen wendok adi welemomoon nadineen. Fidihi dok hanimuntamuntaye tubune hehele mu taneen. Bepaŋdi hehikahan tibaak doktiŋa gweheye mu taneen. ¹⁵ Hidi yadi Kilisto welehi maanen kahileune adigon Wapum tihambaak. Metam nolidi hidi'walaŋ nadikunakunale hatak wendinin mebi nadidok haninadiune toboninbo tubu-udaneen yenimbihitdok helemahelaman mede foloon tiulidokoyaneen. Ingon mede u kulemanŋon en gitagon nadidakale hinek taneen.

¹⁶ Tiŋa hidi didimenin hatinila kadakanin mu tiŋa mede momoon yoyaneen kaŋ metam hanimunimuniŋefit tiin adi hidi Kilisto'walaŋ titiŋ kedom takaliin wendinin mebi nadiŋa mede yofit tiin doktiŋa meka taneen. ¹⁷ Bepaŋ'walaŋ mede yohebet doktiŋa titiŋ momoon tiŋa folofigita nadinadi wendok nadiwene momoon tilak. En hide'walaŋ kadakaninhik doktiŋa folofigita nadinadi wendok nadiwene titinhik hogohi wendok tuwanin monŋokiin tilak.

18 Biyakuyon, Kilisto adi nai kubugon hogok kadakanin dinin kibikon kumumbune dapmaguk. Adi yadi didimenin hinekdi kadakanin titin indi Bepan'walaŋkade nipmewene undun tuguk. Adi kwetfolon me namandap hatilune ulukumunin. Ingon Bepandi tubukaikaune pilali munabuli hatilak.

Imeyout dinin welewele

19 Munabuli hatinila woon me koom kumunin dinin munabulihik yot fafanenin ginen hatigin u Bepan'walaŋ Mede Momoon yenihau-taguk. 20 Metam won adi koomkwaha Nowa adi muwage kwanai tihatilune Bepandi baigon nadikwambundaan wele tubutakale tinen yona woomyemguk, ingon adi mede wobu tigin. Kan metam lufomkabe, 8 hogokdi muwage wendok maanen login, kan ime gabundi tubupilali yanagilu Bepandi yehitubu-lodaguk. 21 Ime won adi Imeyout dinin welewele. Mangande, Bepan adi Imeyout dinin imedi kotigon hanagitak. Imeyoutdi sigihik dinin genjen youtetdok mon. Mon hinek. Won adi hidi Bepan'walaŋ namanda folon walaŋin hatidok mede yofolok tigin. En kotigon hanagitdok tali adi Bepandi Jesu Kilisto kumon ginenin tubukaikaan tubumintahamguk. 22 Undun tinja ne kunum folon loon Bepan'walaŋ kohon didimeninŋenŋkade ilune anelo heki lolonhinit be sanininhinit adi nehitok nadiune foune adi'walaŋ heben folon hatiin.

4

Folofigita ginen dedin tinja nihitubu-lodalak

¹ Kilisto adi folofigita nadiguk doktiņa hidi maan undugon titindok fafaņeneņ. Unduņ tiņila indin nadisuneņ. Nebek niņ folofigita nadilakdi kadakanin bikabuņa sigilulum timilak. ² Unduņ doktiņa kwetfolon hatihati nai kougon halimilakneņgon siloda kadakanin mebimebi mu tiņa Bepaņ'walaņ maņin mede hogok tiņaloon hatiluwaak. ³ Hidi nadisukilitihinit mokitdi hatiņ undiniņ u agaņ koom tuwot hatin. Unduņ hatiņila kadakanin indin tihatiņ. Nemek kadakanin tigigine be siloda kadakanin mebimebi, be ime fafaņeniņ kakaņ nanaņ be kale nanaņe kakaņ nanaņ be hinamuni tiņa ime fafaņeniņ kikalakapmeņ folon nanaņ, tiņa Bepaņ'walaņ mede biņa bepaņ yalayalaņ hekidok tipilapilaye tiyemtiyem, unduņ hatitiņ. ⁴ Kaņ yon adi nadisukilitihinit mokit adi kadakanin diniņ maaneņ hatilune hidi mu yehitubu-lodain doktiņa mu nadidakaleeņ hanintoņa hanin kadaka tiņ. ⁵ Ingon hatigene kougon kaipmuņ hatineeņ be kumuņ tigin wanaņ medehik yodapmandok saņiniņ halimilak adi'walaņkade mede kwanai tineeņ. ⁶ Kumuņ tigin adi indin doktiņa Bepaņ'walaņ Mede Momoon yenihautaņit. Adi kwetfolon diniņ folonamandap doktiņa kadakanin diniņ kibikon tiņa kumuņ tigin. Eņ Bepaņ'walaņkade ulodineeņ adi munabuli diniņ namandap tiņa kedom hatineeņ.

Nai agaņ dulalak doktiņa tiulidoko titindok

⁷ Nemenemek hogohogok dapmandok nai agaņ dulalak doktiņa hidi baigon ıla nadidakaleņila

didimeningon nadikwambundaan kedem ninadiyaneen. ⁸ Tina hidi welehidigon hinek nadikwambundaan welesilon tina menot taneen. Mangande, welesilon ginen hatiņa kadakanin bibin kedem taneen. Wendi nemek noli hogohogok yalakapmedapmalak. ⁹ Tina Bepan'walaŋ metam noli buņa hidigut itoune kaŋ momoonŋon hinek yabudokoyaneen. Hidi kwanai u titindok yolakata adi mu taneen. ¹⁰ Hidi Bepandi silon momoon mebimebi hamguk u metam molomolom hahamulak, ala gitagon yabudokoon behatiņa silon tobogon tali mebimebi haliwiin u tinila kiulihi tina hatiyaneen. ¹¹ Nediyeŋdi Bepan'walaŋ Mede Momoon yobaak adi yadi didimenin yobune Bepan ne'walaŋ mede hinek tibaak. Nebek nin kwanai mineen won adi Bepandi saninin mimbune wendok tuwot tibaak. Hidi undun tubune metamdi nemenemek hogohogok tineen u kaŋ Jesu Kilisto wou folon Bepan niutumbaneen. Kaŋ saninin be youtumba u adi'walaŋkade hakukdi haliwoon halaak. U biyagon.

Kilisto wou doktiņa meka mu titindok

¹² Notneye hinek, hidi tikamanda dinin folofigita fulingon mintahamulak wendok nadibedi tina nemek gitipmun hinek mintanimilak yon boho mu taneen. ¹³ Hidi Kilistodi folofigita nadiguk undugon nadinila welemomoon nadiyaneen. Ala hatigene kougon wougigitnit minŋon mintadakaleune kaŋ welemomoon hinek nadin a yonadifo

wapum tineen. ¹⁴ Hidi Kilisto wou doktiŋa haniŋkadakaune Bepaŋdi hiditok nadiune utumba tuluwaak. Nemek unduŋ tihambune Bepaŋ'walaŋ Munabuli wougigitŋiŋdi hidi'walaŋkade foon hatilak u kedom nadineen.

¹⁵ Tiyaugē hidi'walaaniŋ niŋdi mik be kubo be kadakanin mu titin be titaboloŋet doktiŋa kwadi hekiŋa yot fafaŋeniŋ ginen fowaakneŋ ala nadinadinila hatiyaneen. ¹⁶ En niŋ adi Kilisto diniŋ kayoŋbop hatilak doktiŋa kwadi hekiwaak be yot fafaŋeniŋ ginen kameune wendok nadiune mekaŋgoŋ be bulaningoŋ adi mu tibaak. Adi yadi Kilisto wou u kame hatiŋa Bepaŋ niutumawaak. ¹⁷ I nadinen! Bepaŋ adi meŋimeniye indi'walaŋ mebinik nadinadi kwanaiŋiŋ tububihila titin dok nai dulalak. Indi'walaŋkade tububihila tita-woon Wapum'walaŋ Mede Momoon sigilulum timiin'walaŋ tubudapmalune nemek dediningoŋ hinek mintayembaak?

¹⁸ “Me didimehi yahaŋedok kwanaimin nobu tiŋa kaŋ me Bepaŋ sigilulum timiŋa kadakanin tiin hekidok adi dedin tiyembaak?”

¹⁹ Wendoktiŋa nediyeŋ Bepaŋ'walaŋ hebet takaliŋa mik-kwadi folofigita ginen loneen adi molomhik yehitubu-minta tuguk adi'walaŋkade ulodiŋa titin fofoon hogok tomboyoola tiyaneen. Adi yadi undubo yoon, undubo yoon mu tilak.

5

Indetok nadinene fofon tuluwaak

¹ Nu talitimen nohikdi notneye talitimen uŋoŋ hatiin hiditok mede hanimbit. Kilisto

adi folofigita nadilune nu nagon dauned
hinek kagut. Ala hatigene Jesu wougigitnit
mintadakaleune u maan kahilewaat. Nu
wendoktiŋa mede indiŋ hanindidimewe
nadineŋ. ² Bepaŋ'walaŋ dompa bop
yabudokodok hapmegiŋ hidi yadi kwanai-mede
haniŋgiŋ doktiŋa moŋ, Bepaŋdi nadilak wendok
tuwot welehikdi yabukahileen yabudokoyaneen.
Tiŋa undugoŋ muneen bombon tubumintadok
nadiŋa moŋ, welehik eŋ kwanaidi foloonit
titiŋdok nadiŋa taneen. ³ Be hidetok nadiune
loloŋnit tubune moŋ, adi dompa yabudokoon
Bepaŋ'walaŋ Mede Momoon u hidegoŋ
takaliune habuŋa takaliyaneen. ⁴ Ala kougoŋ
hatigene dompa yabudoko wapum ne buŋa
tuwahik dapmandapmanit mokit kulun
tehindilendileŋnit mokohambaak.

⁵ Mekuyahi naŋgat kaipmuŋ, hiditok maan
indiŋ hanimbit. Bepaŋ'walaŋ Youkudipdi indiŋ
yolak:

“Bepaŋ adi metam nehitok nadiune loloŋnit tiŋ
adi'walaŋ kasop diliteleyemilak. Ingoŋ
metam noli nehitok nadiune fofonit tiŋ
adi yehiulihina silon tobogoŋ tiyemilak.”

Unduŋ doktiŋa hidi yadi hidetok nadiune
foune me talitimenhiyedok nadiyembune
loune adi'walaŋ hebehik foloŋ kulemaŋgoŋ
hatiyaneen. Tiŋa undugoŋ, metam hogohogok,
hidi hidetok nadiune fofonit tubune kitubuloda
taneen. ⁶ Bepaŋ Saŋiniŋ Molom'walaŋ
namanda foloŋ hidetok nadiune fofon tubune
hatineen. Unduŋ tiŋa hatineen ala adi'walaŋ nai
mintawaak uŋaniŋ hanihehibelowaak. ⁷ Bepaŋ

adi momoon hinek habudokolak doktiņa nemek wendok be wendok nadibedi tiinj hogohogok u kwihililiweneen Bepandok mindapmayaneen.

Sanjiniņ Molom ne nihikasopnelak

⁸ Hidi hide nadididimeen kikadoko taneen. Memikhik wapum, Sadan, adi fowa dabuon* undiniņ tiņa i be i tiņa kumuyewit yonā maņiņ ṇaņ tiņa tobodindiņ† tihatilak. ⁹ Ale hidi nadisukiliti tiņa fafaņeņ yali kelehapene tikutneen. Nohiye kwetkwet noli gineņ hatitawiin adi folofigita hidi nadiin undiniņon nadiin. ¹⁰ Biyagon, hidi folofigita nai muniniņ nadilune Bepan silon tobogon Molomdi kasop tihamuņa hehitubu-kilitiņa hehitubudamda tibaak. Adi Kilsto ne'walaņ wougigit dapmandapmanit mokit gineņ nongon yayatdok hanihehimaneguk. ¹¹ Adi'walaņ sanjiniņiņ u hakukdi haliwoon halaak fafaņeniņ. U biyagon.

Mede yokiliti

¹² Nu mede yon adi Sailas nimbe youhamulak. Nu aditok nadiwene me notne foloon hinek tilak. Nu adi Bepan'walaņ silon tobogon diniņ mede muniniņ haniņa indin haniņgiginelat: mede won adi foloon hinek ale wendiniņ maanen fafaņeņ yatneen. ¹³ Metam Babilon kwetnen‡ hatiņa

* **5:8:** Gilik mede gineņ adi laion dabuon yolak. † **5:8:** “tobodindiņ” adi kiyaņeņ wonambuņat tilak wondok yolak. ‡ **5:13:** Babilon kwetnen youkuk won adi Lomahidok nadiņa youkuk. Lomahi'walaņ titiņ u yadi Babilonhidi titiņ tigiņ nabuon doktiņa undun youkuk.

Bepañdi Jesu'walañ kayoñbop hidut mintadok yehidaneguk, adi welemomoon mede hiditok kamehamiinj. Enj mihine Mak adi maan nadis-uhamulak.

¹⁴ Hidi Bepañ'walañ Mede Momoonñdi kitubukiliti tiña menot momoon tiña hidebo kohokukut tiyaneen. Tiña Kilisto dut hatiinj, hidi'walañkade kulemadi wanakan tokidapmaan hatuwaak.

**Bepaŋ'Walaŋ Folofolok Kobuli
Genesis, Exodus, Psalms, and the New Testament in
the Numanggang Language of Papua New Guinea
Sampela hap Buk Baibel long tokples Numanggang**

copyright © 2005 Wycliffe Bible Translators, Inc.

Language: Numanŋaŋ (Numanggang)

Translation by: Wycliffe Bible Translators

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2016-08-30

PDF generated using Haiola and XeLaTeX on 11 Nov 2022 from source files dated 9 Oct 2020

217908e9-ce08-5ac3-9947-124c48579a74